

CONVENIO DE COLABORACIÓN ENTRE A CONSELLERÍA DE ECONOMÍA, INDUSTRIA E INNOVACIÓN E A ASOCIACIÓN PARA A DIXITALIZACIÓN DA INDUSTRIA DE GALICIA (DIHGIGAL) PARA A ELABORACIÓN DE DIVERSAS ACTUACIÓNS ASOCIADAS Á PLANIFICACIÓN INDUSTRIAL DA COMUNIDADE AUTÓNOMA DE GALICIA

Santiago de Compostela, 16 de novembro de 2023

REUNIDOS

Dunha parte, _____, en nome e representación da Consellería de Economía, Industria e Innovación, co NIF _____ e domicilio en Edificio Administrativo San Caetano, s/n, 15704, Santiago de Compostela, na súa calidade de conselleira segundo nomeamento recollido no Decreto 67/2023, de 14 de xuño. Está facultada para este acto en virtude das facultades que lle confire o artigo 34 da Lei 1/1983, do 22 de febreiro, de normas reguladoras da Xunta e da súa Presidencia; o Decreto 116/2022, do 23 de xuño, polo que se establece a estrutura orgánica da Vicepresidencia primeira e Consellería de Economía Industria e Innovación; e o Decreto 79/2023, do 22 de xuño, polo que se fixa a estrutura orgánica das vicepresidencias e das consellerías da Xunta de Galicia.

Doutra parte, _____, co NIF _____, en nome e representación da Asociación para a Dixitalización da Industria de Galicia (DIHGIGAL), inscrita no Rexistro Central de Asociacións co número _____ e con domicilio en Avenida Citröen 3 e 5, Edificio Zona Franca, 1ª planta, 36210, Vigo (Pontevedra). Comparece na súa calidade de presidente, en virtude da Acta fundacional da Asociación para a Digitalización de la Industria de Galicia, con capacidade para asinar convenios da Asociación segundo o Artigo 28 dos estatutos da devandita Asociación DIHGIGAL.

Interveñen en función dos seus respectivos cargos e no exercicio das facultades que, para convir en nome das entidades que representan, teñen conferidas e

EXPOÑEN

I.- Que a Consellería de Economía, Industria e Innovación (Decreto 79/2023, do 22 de xuño) é o órgano da Administración Xeral da Comunidade Autónoma de Galicia ao cal lle corresponde o exercicio, entre outras, de funcións en materia de promoción e dinamización da economía, impulso e coordinación da política económica e industrial, apoio ao sector empresarial e mellora da competitividade das empresas, incidindo na transformación dixital empresarial e na sustentabilidade industrial, así como as relativas a enerxía, investigación, desenvolvemento e innovación.

II.- Que o Decreto 116/2022, do 23 de xuño, dispón a creación da Secretaría Xeral de Industria como novo órgano de dirección ao que se lle atribúen, entre outras, as seguintes funcións: o desenvolvemento, a promoción e coordinación da política industrial dentro da Comunidade Autónoma de Galicia en colaboración cos distintos departamentos da Xunta de Galicia; a identificación das actividades industriais que, pola súa relevancia no ámbito tecnolóxico, innovador ou potencial para xerar cadeas de valor competitivas, concentran as oportunidades de negocios futuros; e a interlocución, no ámbito industrial, cos diferentes axentes económicos e sociais con representatividade no territorio da Comunidade Autónoma de Galicia.

III.- Que a Asociación para a Dixitalización da Industria de Galicia (en adiante DIHGIGAL), constituída ao abeiro da Lei Orgánica 1/2002, reguladora do dereito de asociación, é unha entidade sen ánimo de lucro, con personalidade xurídica propia e plena capacidade de obrar de acordo coa lexislación vixente, e que ten entre os seus obxectivos estratéxicos principais promover unha visión estratéxica industrial a longo prazo orientada á mellora competitiva e ao desenvolvemento sostible.

Ademais, dentro dos seus retos e obxectivos destacan tamén os seguintes: crear un ecosistema colaborativo, aberto e innovador, asegurando a excelencia industrial, mediante a colaboración intersectorial e o desenvolvemento de sinerxías; fomentar a colaboración entre a oferta tecnolóxica e as pemes industriais galegas; apoiar o emprendemento e o desenvolvemento de novos modelos de negocio que fortalezan o ecosistema; colaborar coas administracións públicas para lograr o maior desenvolvemento do ecosistema industrial e tecnolóxico da rexión.

DIHGIGAL está integrada por unha ampla variedade de socios que representan o conxunto do tecido industrial galego desde diferentes ópticas de coñecemento: clústeres, centros tecnolóxicos, universidades e empresas. A súa estrutura interna permíttelles acadar unha visión integral do conxunto da industria galega tendo impulsados ata o de agora un total de 62 proxectos de transformación dixital.

IV.- Que, en liña co desenvolvemento, promoción e coordinación da política industrial, promóvese por parte da Consellería de Economía, Industria e Innovación, en colaboración con DIHGIGAL, a posta en marcha dunha serie de actuacións dirixidas a articular os medios técnicos e humanos necesarios para poder desenvolver os Plans directores dos principais sectores estratéxicos da industria galega.

V.- Que entre os obxectivos do desenvolvemento dos Plans directores sectoriais destacan os seguintes: a elaboración do Mapa Industrial de Galicia, a caracterización e segmentación das áreas industriais e do tecido industrial galego e posterior análise DAFO; o impulso dunha rede de informantes clave sectoriais e territoriais, establecendo liñas de colaboración e elaborando cuestionarios dirixidos a recabar información sobre as súas demandas e opinións; elaboración de programas que inclúan un catálogo de medidas que sirvan para impulsar e fomentar os sectores estratéxicos da industria galega; a proposta de priorización das liñas de actuación a seguir e a planificación temporal das actividades a desenvolver; deseño dun Plan de Comunicación e medición do seu impacto.

VI.- Que para a consecución dos obxectivos enunciados no punto anterior, as partes consideran de mutuo interese establecer fórmulas de colaboración que permitan executar as distintas accións encamiñadas ao cumprimento dos ditos obxectivos, xa que non se contemplan prestacións propias dos contratos regulados na Lei 9/2017, de 8 de novembro, de contratos do sector público. Entre esas fórmulas de colaboración, considérase a máis axeitada a figura do convenio entre unha Administración Pública (Consellería de Economía, Industria e Innovación) e un suxeito de Dereito privado (a Asociación para a Dixitalización da Industria de Galicia), ao abeiro do artigo 47.2 letra c) da Lei 40/2015, do 1 de outubro, de réxime xurídico do sector público.

Por todo o exposto, ambas partes acordan subscribir o presente convenio, que se rexerá polas seguintes:

CLÁUSULAS

Primeira.- Obxecto do convenio

O obxecto deste convenio é instrumentar e regular as condicións específicas que rexerán entre a Consellería de Economía, Industria e Innovación e DIHGIGAL para o desenvolvemento das seguintes actividades:

1. Elaboración do Mapa Industrial de Galicia, definindo as súas variables en tres eixos: empresas industriais, territorio e solo industrial. Debe definirse cada variable co grao de detalle suficiente que permita identificar as dimensións relacionadas con cada unha delas, as fontes de información asociadas, a sistemática de recollida de datos, o nivel de automatización, a frecuencia de actualización e os modos de visualización. O desenvolvemento desta actuación servirá para identificar e recoller os datos que permitan a construción do mapa industrial, determinar a arquitectura de datos que lle dea soporte, e identificar os requisitos da sistemática e frecuencia mínima de actualización para a súa posterior dixitalización.
2. Modelo de segmentación a partir das variables definidas no punto anterior e análise DAFO. Deseño de filtros de segmentación que sirvan para obter unha información sectorial, territorial e de solo industrial, co fin de propor medidas de intervención dirixidas a elaborar a información de entrada para conformar o DAFO de situación.
3. Identificación e impulso dunha rede de informantes clave sectoriais e territoriais. Elaboración dunha base de contactos e establecemento dunha liña colaborativa que sirva para recoller información cualitativa sobre as demandas e/ou necesidades do tecido industrial galego. Elaboración duns cuestionarios tipo dirixidos aos informantes sectoriais e territoriais previamente identificados.
4. Definición do cadro de mando de promoción industrial e determinación da sistemática de actualización permanente a partir dos inputs de datos que proveñan de fontes automatizadas e das necesidades da rede de informantes clave.
5. Elaboración de programas estratéxicos sectoriais que inclúan un catálogo de medidas dirixidas a impulsar e fomentar ata un total de catro sectores prioritarios que serán seleccionados segundo os resultados do mapa industrial e/ou atendendo á súa especial relevancia dentro da economía galega. Estes programas servirán para dar resposta ás necesidades detectadas a través dos informantes clave e, no seu desenvolvemento, teranse en conta os seguintes aspectos: análise do impacto positivo das medidas xa existentes en Galicia e/ou noutros territorios con características socioeconómicas similares; consideración de novas propostas realizadas desde organismos que contén con coñecemento sectorial acreditado; centros tecnolóxicos, universidades ou calquera outra entidade que poida aportar valor engadido na proposta.
6. Proposta de priorización das liñas de actuación vinculadas aos distintos programas estratéxicos sectoriais para a súa valoración desde a Secretaría Xeral de Industria.

7. Planificación temporal do desenvolvemento das actividades que se propoñan levar a cabo dentro dos Plans directores dos distintos sectores estratéxicos, establecendo as relacións de dependencias entre estas, fitos de consecución e indicadores de seguimento.
8. Elaboración da estratexia a seguir para dar a coñecer e impulsar o Plan de Promoción industrial de Galicia. Completarase co deseño dun sistema de feedback dirixido a medir o grao de satisfacción dos destinatarios do antedito Plan.
9. Programación e realización de eventos e accións de dinamización dirixidas a difundir o Plan de Promoción Industrial de Galicia. Dentro desta actividade, vaise considerar un desglose por subactividades:
 - 9a, actividades de dinamización realizadas de xaneiro a abril (ambos meses incluídos).
 - 9b, actividades de dinamización realizadas de maio a setembro (ambos meses incluídos).

Segunda.- Obrigas da Consellería de Economía, Industria e Innovación

1. Colaborar no desenvolvemento daquelas iniciativas e accións vinculadas ao obxecto do convenio para asegurar o seu cumprimento.
2. Financiar o 100% das actividades obxecto deste convenio establecidas na cláusula primeira, ata a contía máxima que se recolle na cláusula cuarta.
3. Supervisar que as actividades sexan desenvolvidas de acordo coas estipulacións do presente convenio e ditar as instrucións que se estimen precisas para a referida colaboración.

Terceira.- Obrigas de DIHGIGAL

1. Desenvolver as actividades obxecto do convenio, seguindo as liñas de actuación establecidas na cláusula primeira.
2. Con carácter previo á sinatura deste convenio e xunto coa solicitude de pagamento, deberá acreditar ante a Consellería de Economía, Industria e Innovación que se atopa ao corrente das súas obrigas tributarias e fronte á Seguridade Social e que non ten pendente de pagamento ningunha outra débeda coa Administración Pública da Comunidade Autónoma, no caso de que

se opoña á consulta automatizada deses datos prevista na cláusula décimo terceira deste convenio.

3. Facilitar toda a información que lle sexa requirida pola Intervención Xeral da Comunidade Autónoma, polo Tribunal de Contas ou o Consello de Contas, no exercicio das súas respectivas funcións de fiscalización e control de destino dos fondos transferidos e facilitar a inspección e control dos órganos da Consellería de Economía, Industria e Innovación co fin de supervisar o cumprimento das actividades do convenio.

4. Seguir as normas sobre protección de datos, concretamente a Lei orgánica 3/2018, de 5 de decembro, de protección de datos persoais e garantía dos dereitos dixitais.

5. Achegar os informes e documentos que acrediten o desenvolvemento das actividades do presente convenio, así como os informes e demais documentos requiridos pola Consellería de Economía, Industria e Innovación.

6. Facer constar expresamente a colaboración prestada pola Consellería de Economía, Industria e Innovación en todo o material de execución, información e publicidade das actividades do convenio, coa utilización do correspondente logotipo identificativo, en virtude do disposto no Manual de Identidade Corporativa da Xunta de Galicia.

Cuarta.- Contía da achega económica

Para o desenvolvemento das actuacións previstas no convenio, a Consellería de Economía, Industria e Innovación achegará a DIHGIGAL a cantidade máxima de douscentos mil euros (200.000€), que se financiarán con cargo á seguinte aplicación orzamentaria, código de proxecto e anualidades seguintes:

Código proxecto	Aplicación orzamentaria	2023	2024	TOTAL
2023 00006	05.02.732A.640.8	57.961€	142.039€	200.000€

Esta achega económica realizarase como unha compensación dos gastos nos que incorra DIHGIGAL para a axeitada execución das accións obxecto do convenio. En ningún caso se aboarán importes que supoñan a obtención de lucro por parte da dita asociación.

Quinta.- Gastos atendibles

Con carácter xeral, considéranse gastos atendibles aos efectos do convenio aqueles que, de xeito indubidable, responden á natureza das actividades e fins do convenio.

Requisitos dos gastos con cargo ao convenio:

Os gastos deberán ser realizados, facturados e efectivamente pagados dentro do ámbito temporal do propio convenio e, polo tanto, no que atinxe unicamente a actuacións realizadas entre a data da súa sinatura e a data de finalización, de conformidade cos prazos sinalados na cláusula sexta. Exceptúanse aqueles gastos cuxos pagamentos deban efectuarse nun momento posterior por axustárense aos calendarios de recadación, como os ingresos á conta do IRPF ou cotas de seguros sociais.

O importe do IVE (imposto do valor engadido) non se considerará gasto xustificable cando sexa susceptible de recuperación ou compensación, salvo que se acredite a exención do mesmo e consecuentemente non resulte recuperable.

Todos os gastos externos iguais ou superiores aos 3.000 euros, IVE excluído, deben ser notificados á Consellería de Economía, Industria e Innovación antes da súa contratación.

Os gastos nos que incorra DIHGIGAL serán compatibles con outras cantidades públicas ou privadas que puidese recibir, que deberán ser declaradas nas liquidacións do convenio e diminuirán o importe total a achegar pola Consellería de Economía, Industria e Innovación.

Todos os gastos externos xustificados por DIHGIGAL deben axustarse a prezos de mercado, polo que podería solicitarse unha auditoría sobre os gastos xustificados, no caso de que non exista outro patrón de público coñecemento que permita establecer o dito axuste.

Sexta.- Xustificación e pagamento das contribucións da Consellería de Economía, Industria e Innovación

1. A Consellería de Economía, Industria e Innovación achegará para o financiamento do custo das accións previstas no presente convenio un importe total máximo de douscentos mil euros (200.000€) segundo as anualidades reflectidas na cláusula cuarta. Esta cantidade será aboada con cargo aos orzamentos da Xunta de Galicia para os anos 2023 e 2024, nos que se dotará crédito axeitado e suficiente para financiar ata o 100% esta achega, conforme á partida orzamentaria 05.02.732A.640.8.

2. A contribución da Consellería de Economía, Industria e Innovación correspondente ao ano 2023 realizarase nun pago único no mes de decembro, unha vez finalizadas as actividades 1, 2 e 8 relacionadas na cláusula primeira deste convenio. Este pagamento realizaranse unha vez se acredite a realización destas e segundo os importes referidos no ANEXO I que recolle o orzamento previsto por actividade.

A contribución da Consellería de Economía, Industria e Innovación correspondente ao ano 2024 realizarase de xeito fraccionado en dous pagamentos que están vinculados á realización e

acreditación das actividades relacionadas na cláusula primeira deste convenio. Un primeiro pago que se aboará unha vez acreditada a realización das actividades 3, 4 e 9a e un segundo pago final que se aboará unha vez acreditada a realización das actividades 5, 6, 7 e 9b.

Estes dous pagamentos realizaranse unha vez se acredite a realización das súas actividades asociadas e segundo os importes referidos no Anexo I que recolle o orzamento previsto por actividade.

De acordo co establecido nos parágrafos anteriores, a distribución dos tres pagos a realizar no período 2023-2024, atendendo ás actividades a realizar e o importe a percibir, sería a seguinte:

	Decembro 2023	1º pago 2024	2º pago final 2024
Actividades a realizar	Actividades 1, 2 e 8	Actividades 3, 4 e 9a	Actividades 5, 6, 7 e 9b
TOTAL	57.961€	40.619€	101.420€

Tendo en conta a imposibilidade de calcular o importe exacto de todas as actuacións previstas no marco deste convenio, o beneficiario, con previa comunicación á Secretaría Xeral de Industria no seo da Comisión de Seguimento do convenio, poderá realizar modificacións entre as diferentes actividades e conceptos de gastos sempre que se trate de minoracións iguais ou inferiores ao 20% dos importes previstos. Estas modificacións non poderán supoñer un incremento da achega establecida nin modificar os importes da achega prevista para cada anualidade nin as condicións de xustificación recollidas no presente convenio.

3. Para a acreditación á que se refire o punto anterior, DIHGIGAL presentará á Secretaría Xeral de Industria, unha vez finalizados os traballos que se detallan na cláusula primeira deste Convenio e, en todo caso, coa data límite do 15 de decembro de 2023 para a anualidade de 2023, e do 15 de maio e do 15 de outubro de 2024 para os pagos da anualidade de 2024, a seguinte documentación:

3.1. Unha relación clasificada dos gastos nos que se incorreu, coa identificación do concepto de gasto, acreedor e do documento, o seu importe, data de emisión e data de pagamento.

3.2. As facturas e demais documentos de valor probatorio equivalente no tráfico xurídico-mercantil ou con eficacia administrativa, así como os xustificantes das transferencias bancarias, certificacións bancarias ou extractos bancarios, ou documentos obtidos a través da banca electrónica sempre que contén co selo do banco, acreditativas dos pagamentos polos servizos realizados.

En ningún caso serán admisibles os pagamentos xustificadas mediante recibo do proveedor. Nestes documentos deberán estar claramente identificados o receptor e o

emisor do pagamento, o número e a satisfacción do importe total da factura (IVE incluído), así como o concepto ao que se refiren. No caso de que no documento de pagamento non se faga referencia ás facturas, deberá ir acompañado da documentación complementaria que permita verificar a correspondencia entre gasto e pagamento. No caso de que un xustificante de pagamento inclúa varias facturas, achegarse unha relación detallada das mesmas na que se poida apreciar que o pagamento se corresponda coas ditas facturas.

3.3. Tres ofertas de diferentes provedores cando o importe de cada gasto no que incorra DIHGIGAL sexa igual ou superior a 15.000 €, IVE excluído. Cando polas especiais características dos gastos non exista no mercado suficiente número de entidades que o presten ou subministren, deberá achegarse unha xustificación de tal circunstancia. Se a elección entre as ofertas presentadas non tivese recaído na proposta económica máis vantaxosa, deberá achegarse unha memoria xustificativa.

3.4. En caso de oposición expresa a que a Secretaría Xeral de Industria da Consellería de Economía, Industria e Innovación poida realizar as consultas polos seus propios medios, DIHGIGAL deberá de presentar as certificacións expedidas polas respectivas Administracións Públicas, que acrediten que está ao corrente das obrigas tributarias e da Seguridade Social, así como a acreditación de non ter pendente de pagamento ningunha outra débeda, por ningún concepto, coa Administración Pública da Comunidade Autónoma.

No suposto de que o importe do IVE supoña un custo real soportado, poderá ser incluído na solicitude de pagamento. Neste caso, deberá presentarse un certificado oficial expedido pola AEAT, acreditativo da situación da entidade con respecto ao IVE.

3.5. Unha memoria final onde se xustifique o cumprimento dos obxectivos previstos e no que se describan de xeito individualizado as distintas accións desenvolvidas, produtos elaborados e as incidencias máis significativas no marco deste convenio. Nos casos nos que sexa posible, empregaranse indicadores obxectivos para medir o impacto logrado a través de cada acción, concretamente no que se refire ao número de accións de dinamización desenvolvidas dentro do Plan de Comunicación e ao número de contactos realizados dentro da rede territorial de informantes.

3.6. No caso daquelas accións nas que se elabore documentación, materiais gráficos, folletos, fotografías ou calquera outro material en formatos analóxicos ou dixitais, xuntarase unha copia dos mesmos ou a ligazón a webs e outros espazos virtuais relevantes nos que poida acreditarse a súa existencia.

3.7. Declaración da titularidade da conta bancaria onde se debe realizar o pagamento.

4. DIHGIGAL responsabilizárase da veracidade dos documentos presentados. Coa solicitude de pagamento deberá achegarse unha declaración responsable de que non existe ánimo de lucro e que os importes reclamados se circunscriben á satisfacción dos gastos nos que teña incorrido para a execución das actividades obxecto deste convenio. Esta declaración responsable deberá estar asinada dixitalmente pola persoa que ostente a representación legal da entidade.

5. En todo caso, a Consellería de Economía, Industria e Innovación, a través da Secretaría Xeral de Industria, resérvase o dereito de solicitar toda a documentación que se considere precisa en relación coa realización das actuacións obxecto do presente convenio e calquera outra que estime oportuna para a correcta xustificación do gasto e o seu pagamento.

6. DIHGIGAL manterá a disposición da Consellería de Economía, Industria e Innovación ou de calquera organismo público con capacidade de fiscalización da Comunidade Autónoma de Galicia, tales como a Intervención Xeral, o Tribunal de Contas e o Consello de Contas, todos os xustificantes dos gastos e ingresos obtidos a fin dunha verificación *in situ*, ben por medios propios ou mediante auditor externo. O prazo para a comprobación material de facturas e xustificantes de gasto será de 5 anos desde a finalización do prazo de vixencia do convenio.

Sétima.- Comisión de Seguimento

Para facilitar a execución e desenvolvemento, así como o seguimento e cumprimento do presente convenio, constituirase unha comisión paritaria, formada por dous/dúas representantes de cada parte asinante. Esta Comisión actuará como órgano de vixilancia, seguimento e control do establecido neste convenio. Así mesmo, esta comisión supervisará a programación das accións concretas ás que se refire o convenio e avaliará e controlará as actividades realizadas.

A comisión reunirse en sesión constitutiva nun prazo non superior a un mes desde a sinatura deste convenio. Así mesmo, reunirse tantas veces como o soliciten as partes para analizar o grao de cumprimento dos obxectivos fixados, propor a resolución dos conflitos específicos que puidesen exporse e realizar calquera outra actuación de coordinación que se estime precisa.

O/A presidente/a da Comisión, que será un dos representantes da Consellería de Economía, Industria e Innovación, terá voto dirimente.

O funcionamento da Comisión de Seguimento farase ao abeiro do réxime xurídico dos órganos colexiados contido na sección III, co capítulo I do título I (artigos 15 e seguintes) da Lei 16/2010, do 17 de decembro, de organización e funcionamento da Administración Xeral e do sector público autonómico de Galicia.

Oitava.- Vixencia e causas de resolución

Este convenio entrará en vigor o día da súa sinatura e terá vixencia ata o 30 de novembro de 2024.

O convenio extinguirase polo cumprimento das actuacións que constitúen o seu obxecto ou por incorrer en causa de resolución. Son causas de resolución:

- a) O transcurso do prazo de vixencia do convenio.
- b) O acordo unánime de todos os asinantes.
- c) O incumprimento das obrigas e compromisos asumidos por parte dalgún dos asinantes. Neste caso, calquera das partes poderá notificar á parte incumplidora un requirimento para que cumpra nun prazo de 10 días hábiles coas obrigas ou compromisos que se consideren incumplidos. Este requirimento será comunicado á Comisión de Seguimento do convenio e ás demais partes asinantes. Se transcorrido o prazo indicado no requirimento persistira o incumprimento, a parte que o dirixiu notificará ás partes asinantes a concorrencia da causa de resolución e entenderase resolto o convenio.
- d) Por decisión xudicial declaratoria da nulidade do convenio.
- e) Introducción de modificacións substanciais sen que as mesmas se aceptasen pola Comisión de seguimento.
- f) Por calquera outra causa distinta das anteriores prevista no convenio ou noutras leis.

Se cando concorra calquera das causas de resolución do convenio existen actuacións en curso de execución, as partes, a proposta da Comisión de Seguimento do convenio, acordarán a continuación e finalización das actuacións en curso que consideren oportunas, establecendo un prazo improrrogable para a súa finalización, transcorrido o cal deberá realizarse a liquidación das mesmas.

Novena.- Modificación

O presente convenio poderá ser obxecto de modificación cando teña como finalidade o logro dos obxectivos de estabilidade orzamentaria e sustentabilidade financeira. A dita modificación terá por obxecto a redución do volume das obrigas ou a ampliación do seu prazo de execución.

Décima.- Publicidade da subscrición do convenio

De conformidade co artigo 15 da Lei 1/2016, do 18 de xaneiro, de transparencia e bo goberno e o Decreto 126/2006 de 20 de xullo, polo que se regula o Rexistro de Convenios da Xunta de Galicia, a Consellería de Economía, Industria e Innovación publicará no *Diario Oficial de Galicia*, no Portal de transparencia e Goberno aberto e na súa páxina web oficial o importe da

prestación económica concedida ao abeiro deste convenio e a entidade destinataria desta, e incluírá igualmente a referida contribución e as sancións que como consecuencia deste puidesen impoñerse nos correspondentes rexistros públicos, polo que a sinatura do convenio leva implícita a autorización para o tratamento necesario dos datos da entidade e a referida publicidade, así como a súa cesión aos órganos competentes da Consellería de Economía, Industria e Innovación.

DIHGIGAL deberá subministrar toda a información necesaria para que a Consellería de Economía, Industria e Innovación poida dar cumprimento ás obrigas previstas no Título I da Lei 1/2016, do 18 de xaneiro, de transparencia e bo goberno. As consecuencias do incumprimento desta obriga serán as establecidas no artigo 4.4 da citada lei.

Undécima.- Propiedade intelectual

A documentación xerada como consecuencia da execución deste convenio será propiedade conxunta de DIHGIGAL e a Consellería de Economía, Industria e Innovación. Na medida en que a mesma sexa susceptible de protección mediante o réxime da propiedade intelectual, seralles de aplicación o disposto no artigo 7 do Texto refundido da propiedade intelectual, relativo á obra en colaboración.

A titularidade de todos os dereitos de propiedade intelectual inherentes á documentación elaborada será de DIHGIGAL e da Consellería de Economía, Industria e Innovación por ámbito mundial e polo prazo de protección dos dereitos de propiedade intelectual, de acordo coa normativa nacional e comunitaria aplicable.

Duodécima.- Responsabilidade

A subscrición do presente convenio non implicará relación laboral contractual ou de calquera outro tipo entre os profesionais ou entidades que vaian desenvolver as actuacións obxecto deste convenio e a Consellería de Economía, Industria e Innovación, de tal xeito que non se poderá esixir a esta responsabilidade ningunha, nin directa nin subsidiariamente, polos actos ou feitos acaecidos no desenvolvemento do devandito convenio.

Décimo terceira.- Autorizacións

DIHGIGAL consente expresamente a inclusión dos datos relevantes e persoais deste convenio nos rexistros públicos que proceda, de acordo co Decreto 126/2006, do 20 de xullo, así como poderá exercer os seus dereitos de acceso, rectificación, cancelación e oposición respecto do contido dos rexistros antes citados ante a Consellería de Economía, Industria e Innovación, con sede no complexo administrativo de San Caetano s/n, 15704, Santiago de Compostela.

Este consentimento esténdese á autorización para a cesión dos seus datos á entidade financeira na que se aboe o pagamento, ao *Diario Oficial de Galicia* e ás demais cesións previstas na lei.

Tamén comporta a autorización á Consellería de Economía, Industria e Innovación para solicitar as certificacións que deban emitir a Axencia Estatal da Administración Tributaria, a Tesourería da Seguridade Social e a Consellería de Facenda e Administración Pública da Xunta de Galicia.

Décimo cuarta.- Natureza e normativa

O presente convenio ten natureza administrativa quedando fóra do ámbito de aplicación da Lei 9/2017, do 8 de novembro, de contratos do sector público, pola que se traspoñen ao ordenamento xurídico español as directivas do Parlamento Europeo e do Consello 2014/23/UE, do 26 de febreiro de 2014, de conformidade co seu artigo 6, sen prexuízo da aplicación dos principios desa lei para resolver as dúbidas e lagoas que puidesen presentarse, consonte o previsto no seu artigo 4.

As partes comprométense a resolver de común acordo, ante a Comisión de seguimento, calquera controversia que puidese suscitarse sobre a interpretación ou execución deste convenio. En caso de conflito, as partes acordan o sometemento á Xurisdición Contencioso-Administrativa.

Para todo o non previsto neste convenio aplicárase o previsto na Lei 16/2010, de 17 de decembro, de organización e funcionamento da Administración Xeral e do sector público autonómico de Galicia, a Lei 40/2015, do 1 de outubro, de réxime xurídico do sector público, así como na Resolución do 8 de abril de 1991 (DOG nº 82, do 30 de abril) pola que se fai público o acordo do Consello da Xunta de Galicia, do 27 de marzo de 1991, sobre convenios de cooperación con outros entes públicos e de colaboración con particulares, na Lei 1/2016, do 18 de xaneiro, de transparencia e bo goberno e no Decreto 126/2006, do 20 de xullo, polo que se regula o Rexistro de Convenios da Xunta de Galicia, en todo o que non se opoña á Lei 1/2016, do 18 de xaneiro.

E, en proba de conformidade, as partes asinan o presente convenio no lugar e data ao principio indicados.

Pola Consellería de Economía, Industria e
Innovación

Pola Asociación para a Dixitalización da
Industria de Galicia (DIHGIGAL)

ANEXO I

ORZAMENTO PREVISTO POR ACTIVIDADE

ACTIVIDADE	Tipoloxía de gasto	Orzamento 2023	Orzamento 2024
Actividade 1: Mapa industrial de Galicia	Gastos persoal	2.000€	
	Servizos	30.000	
	TOTAL A1	32.000	
Actividade 2: Modelo de segmentación e análise DAFO	Gastos persoal	2.000	
	Servizos	15.000	
	TOTAL A2	17.000	
Actividade 3: Identificación e impulso da rede de informantes clave	Gastos persoal		6.000
	Servizos		5.000
	TOTAL A3		11.000
Actividade 4: Cadro de mando de promoción industrial	Gastos persoal		3.000
	Servizos		20.000
	TOTAL A4		23.000
Actividade 5: Programas estratéxicos sectoriais	Gastos persoal		15.800
	Servizos		69.000
	TOTAL A5		84.800
Actividade 6: Proposta de priorización de liñas de actuación	Gastos persoal		5.000
	TOTAL A6		5.000
Actividade 7: Planificación temporal e relacións de dependencias entre actuacións, fitos, de consecución e indicadores de seguimento	Gastos persoal		5.000
	TOTAL A7		5.000
Actividade 8: Elaboración da estratexia para dar a	Gastos persoal	2.861	
	Servizos	6.100	

coñecer o Plan e implantación dun sistema de feedback cos destinatarios	TOTAL A8	8.961	
Actividade 9: Programación e realización de eventos e actividades de dinamización <i>9a Actividades Xaneiro-Abril: 6.619€</i> <i>9b Actividades Maio- Setembro: 6.620€</i>	Gastos persoal	1.310	
	Servizos	11.929	
	TOTAL A9	13.239	
	TOTAL ANUAL	57.961	142.039
	TOTAL CONVENIO		200.000